

李文忠公全書

奏稿

卷五十一
五十一

李文忠公奏稿

卷之五十一目錄

遵旨添營請撥月餉摺

光緒十年七月初五日

請飭周盛波募勇來津片

光緒十年七月初五日

遵停永定交土章程摺

光緒十年七月初六日

永定河歲款請免扣平片

光緒十年七月初六日

勇營挑河應從緩辦片

光緒十年七月初六日

拆除清河私埝摺

光緒十年七月初六日

擬請收捐購器摺

光緒十年七月十四日

借款購器片

光緒十年七月十四日

會查防務摺

光緒十年七月十八日

口外靜謐練軍回防摺

光緒十年七月二十日

遵呈海防圖說摺

光緒十年七月二十三日

奏留馬建忠片

光緒十年七月二十三日

旅順電綫移撥經費摺

光緒十年八月初一日

淮軍支款請循舊辦理摺

光緒十年八月十一日
附清單

查覆王可陞參款摺

光緒十年九月初四日

撥濟霆軍洋鎗片

光緒十年九月初四日

京引展期復額摺

光緒十年九月初四日

旅順電綫酌提奉餉片

光緒十年九月初四日

近省隄河工程摺

光緒十年九月初四日
附清單

籌辦團練摺

光緒十年九月二十一日

請豁積欠旗租摺

光緒十年九月二十一日

新募盛軍到津摺

光緒十年九月二十四日

接濟臺防要餉片

光緒十年九月二十四日

尖底舢板勢難制勝摺

光緒十年九月二十四日

派船援閩擬用洋將摺

光緒十年九月二十六日

輪船聯絡德國水師片

光緒十年九月二十六日

黃瑞蘭不堪任用片

光緒十年九月二十六日

李文忠公奏稿卷五十一

全集一之五十一

桐城吳汝綸編錄

遵

旨添營請撥月餉摺

光緒十年七月初五日

奏爲遵

旨籌議添募勇營籲請

飭部月撥餉銀以濟要需恭摺覆陳仰祈

聖鑒事竊臣承准軍機大臣字寄六月二十九日奉

上諭吳大澂奏請飭南北洋添募勇營一摺著李鴻章曾國荃查

照吳大澂所奏悉心酌度據實具奏如須添募並著覈明餉需奏

請飭撥等因欽此臣查北洋海口延袤千餘里口岸紛歧僅就淮

練各軍現有之兵力及吳大澂所部各營分布要口大段尙不甚

空虛而防務實未敢謂周密況敵船一經北向必挾有陸隊同來

各口同時並警彼此不能相顧若無大枝勁旅往來援擊誠恐一隙之疏掣動全局

京畿門戶尤宜籌備完固何敢稍涉疏虞臣深知餉項艱難平日不敢遽請添募但以購備利器爲急蓋以軍械非倉猝可圖勇營可隨時增募也現在法人攻擊閩廠兵燹已開該國正集議籌餉添兵剋期大舉先擾南省據地爲質必將北犯畿輔以遂其要挾之謀我當厚集其勢以待之亟應及時添練以壯聲援吳大澂原奏謂新招之隊與久練之師按成配搭可期得力洵屬切中機宜已督飭軍械製造各員查核現存哈乞開斯毛瑟等後門快鎗及已購未到之後膛鎗礮尙可添募十數營約計月需餉銀五萬兩目下淮餉防餉均少餘存近因沿海各省辦防解數驟短支絀萬分現軍方苦饑之更無可供添營之用惟有籲懇

聖慈俯念北洋海防尤關緊要直隸著名貧瘠無餉可籌非他省情形可比

特恩敕下戶部自本年七月分起每月由部庫就近撥銀五萬兩俾得派員支領及早募練成軍實於畿防根本重地大有裨助至吳大澂所部各營兵力亦單尙有餘存鎗械應如何酌予分撥之處俟奉

旨允准後臣再與吳大澂妥商就款籌辦隨時咨部查核所有遵旨籌議添募勇營並請撥月餉緣由謹繕摺由驛馳陳伏乞

皇太后

皇上聖鑒訓示謹

奏

請飭周盛波募勇來津片

光緒十年七月初五日

再津防淮軍鎗礮精利訓練嚴整首推湖南提督周盛傳爲最該軍馬步十六營從前隨剿粵捻實賴周盛傳胞兄遇缺題奏提督前涼州鎮總兵周盛波會同統帶故臨敵指揮如意屢奏奇功周盛波勇於戰陣深得士心周盛傳嚴以馭眾兼師洋法各有所長亦互相爲用也周盛波因母老乞歸退閒已久前劉銘傳過津爲言時事多艱將材難得欲調周盛波赴臺襄助該提督未之許也惟念周盛波從臣患難最久現當畿防喫緊其弟盛傳統師在津須添生力軍與之犄角援應氣勢更當百倍臣擬令周盛波由淮北選募精壯十營剋日北來配給西洋後膛鎗礮與周盛傳所部合隊操練設遇法虜深入臣當督率該提督等縱橫盪擊以期挫遏凶鋒稍副

聖主倚任之重正摺內請撥部餉如蒙

俞允則添募經費有著應請

敕下兩江督

臣安徽撫臣

轉飭周盛波迅速募勇統領來津以資

指臂之助該員之母年踰九旬自不可無人侍奉然值此外侮緊急遑恤其私擬俟法事定後併營節餉再懇

恩准周盛波周盛傳兄弟分一人假旋終養仍留一人在營治軍庶爲公私兼盡是否有當附片具陳伏乞

聖鑒訓示謹

奏

遵停永定交土章程摺

光緒十年七月初六日

奏爲遵停永定河村民交土章程並查明辦理不善之員弁分別參辦恭摺仰祈

聖鑒事竊臣欽奉光緒十年四月二十二日

上諭前據太常寺卿徐樹銘奏永定沿河被水村民請暫停河工酌用民力章程一摺當諭令李鴻章妥爲籌辦茲復據該京卿奏稱村民交土流弊已極永定河一帶被水災民異常困苦豈容稍有勒派所有河工令民交土章程著卽行停止汛官余昌壽孫國培等旣據稱有折價擾民情事卽著李鴻章畢道遠周家楣查明從嚴參辦等因欽此遵查前奉三月初四日

寄諭當飭永定河道游智開嚴禁勒派力除弊端並將交土章程停止一節體察議稟正據稟復核辦聞續奉前因並准徐樹銘鈔

錄各村控詞折價清單由順天府尹臣陸續轉咨又派候補道許
鈴身前往周歷通工認真詳細確查凡係私自勒折浮索員弁卽
會同游智開指名稟請參辦其村民交土雖係向章漸多流弊應
卽遵

旨停止飭先出示曉諭旋據該道等查明擬議稟復前來臣查永
定河額設防險民夫一千六百五十名係沿河宛平良鄉涿州固
安霸州永清東安武清等州縣近隄十里村莊派撥協同積土防
險原所以各保身家載在河工則例仍分別撥給養夫田畝優免
雜差以資挹注此項民夫向於夏至上隄秋分下隄計時須九十
日之久前河道李朝儀任內詳准改於春融農隙時上隄每名日
挑土一方向章九十日者減爲四十五日合土四十五方挑竣卽
令歸農仍酌留二成於大汛協同搶險其應挑之土預估呈報核

飭州縣派撥鬪分段落不准員弁兵役指派包折尙爲實事求是起見蓋從前交土多係縣役河兵串通得錢包折並無實土到隄是以李朝儀就向章變通整頓又核減日期藉示體恤所謂逐日更替者如甲乙兩人甲輪單日挑土乙輪雙日挑土彼此更番輪替均其勞逸非謂每人止挑一日不再輪值約計每年全河不過役民夫三千人上下並無數萬十數萬之多自改章以後頗能實土到隄有裨河務惟向係兵役包折侵入私囊每土百方折給數十方即可了事今須到工實做不能如前之徒有具文人情好逸惡勞未能皆願各村士農工商不一未必人習畚鍤仍不得不按戶攤錢或歸本村強壯民夫挑積或呈明折價或由鄉董及河工弁兵雇夫代辦在工員弁各顧考成不能不按時催督而日久弊生經手弁兵人等即藉端刁難漁利並有戶口先密後稀地畝先

肥後瘠仍照原冊派夫者辦理既未得宜近又災歉頻仍力有不逮於是紛紛呈控臣前已飭據該河道將各村應出夫土分別減免並詳查戶口地畝酌盈劑虛務昭平允在案茲欽奉

諭旨將交土章程停止足以杜弊恤民自當永遠遵照此後挑土不能不辦所需方價已另片陳請卽於扣平項下撥給免誤要工至各村所呈折交方價錢數據許鈐身查訪大致相同惟內有京錢東錢固票當十錢之別京錢每千合制錢五百文東錢每千合制錢一百六十五文固票每千合制錢二百文當十錢每千合制錢一百文如狼堡盧城二村皆係當十錢名雖六七百千實止制錢六七十千合之土方例價尙多不足此外有適符例價及浮收者該道等提集各汛被控外委百總目兵嚴加審訊大都村董弁目彼此商辦尙無勒折實跡其浮收之數謂係代辦人飯食等用

並未供認入已惟定章交土不准弁目私自包折其應挑段落亦不准弁目指派今稱或指派遠土或代雇夫頭經手方價實屬顯違功令且既經手必有刁難侵蝕情事應將指控之外委史芳卽史方之武殿平卽吳殿平王廷彥張永祥王兆瑞張天泰唐永山張殿芳八名百總汪鳳林卽汪五前劉希用馮玉山馬珍李士元崔有恆劉振彩七名目兵寶起李萃董玉王海李順何玉山王奎七名並另案被控之外委王文魁百總王致和張光勇目兵楊廷祥卞有才王照熊張福祥七名及未被指控查有劣跡之外委劉振和均卽重責斥革除糧至汛官余昌壽等前已撤任雖無勒派索擾經手方價其各村不能人人親自挑土亦勢有必然惟任聽弁目干預致被控告足見辦理不善孫國培於夫土淤地均有控案聲名平常不洽輿情應卽遵

旨嚴參請將同知銜補用知縣天津縣縣丞孫國培卽行革職以
示懲儆其餘各汛員情節稍輕並請將藍翎升用同知南岸頭工
下汛宛平縣縣丞余昌壽藍翎升用同知南岸三工涿州州判周
蓉第均革去同知升階並藍翎又五品銜升用同知南岸四工固
安縣縣丞張映辰革去五品銜並同知升階又北岸四工下汛固
安縣縣丞李丕裕請摘去頂戴與余昌壽周蓉第張映辰均開缺
留工另補又四品銜升用知州候補通判謝政賢請革去四品銜
並知州升階其失察弁目折價未被指控之汛官升用知縣南二
工良鄉縣縣丞陳麗生理問銜北岸頭工下汛宛平縣縣丞方志
勤升用知縣北岸二工上汛良鄉縣縣丞鄭官賢升用同知北岸
五工永清縣縣丞吳宗騏請革去同知知縣升階理問升銜暫行
留任以觀後效北岸頭工上汛武清縣縣丞張善班所轄之盧城

等村雖折價不敷挑土但任弁目擅折請摘去頂戴又五品銜南岸六工霸州州判錢承禧失察已革鋪兵預支夫價除撤任外請革去五品銜此外員弁目兵或並無不合或已有事故應免置議至原撥養夫地畝飭卽查勘除有水冲沙壓不堪耕種者除糧外其餘或撥回另佃或循舊承種悉聽民便嗣後續有冲壓及淤復之地隨時勘明分別除糧升科凡承種養夫地畝村民遇大汛搶險之時由各本村公正紳董督率幫搶各衛身家每種夫地三十畝出夫一名免其完納地租險平卽行下隄工員無庸干預紳董亦不得藉端派斂違則重懲未經出夫者仍照章完租如有不種夫地而自願出夫幫搶者免其雜差其災歉苦累村莊仍照地方章程減免差徭卽飭各該州縣一體明白曉諭毋得稍任差役擾索未盡事宜隨時稟詳核辦此外各河向歸民辦者仍照章辦理